

編號 2 號

【錢鼠仔過大路】彭瑞珠原作

「錢鼠仔過大路了喲！」大錢鼠仔座頭，後背該隻咬等頭前這隻个尾，佢等行做一列，對佢屋脣个涵仔，歸去了。這兜錢鼠仔，大霸霸仔<sup>1</sup>行過佢屋下个電視間。佢兩隻腳趺上凳板、右手定定仔抓起掣仔鞋<sup>2</sup>，兩粒目珠金金看等佢等，瞪瞪仔<sup>3</sup>擎起佢个右手，兩隻腳準備愛跳起來……，佢就毋相信！

「毋好打佢哦！佢等，會帶財來！」吾姆一出聲，佢也準無事情，定定仔坐轉凳板。毋過，佢還係眼視視仔<sup>4</sup>掌等佢等，一擺、兩擺……，錢鼠仔就毋驚佢了，成時，還會幹轉頭來視佢！毋過，佢等个目珠仁矇矇，怕係有近視！

佢恹毋解，錢鼠仔恁臭，仰做得分佢等歇，還無收屋稅，又還做毋得打佢？還過，佢等雖然毋會偷食穀，毋過，會偷食店項个魷魚仔，還會同歸包仔新新个衛生紙嚙啊綿綿，絮去做竇！

就因為佢過無膽，一著驚就唧唧滾，該聲音，有一息仔像銀

角仔砑砑砑砑<sup>5</sup>个聲，恁呢，佢就愛讓佢？佢恹毋解，尋書看：錢鼠仔个嘴尖尖，同老鼠仔無共樣；佢食蟲仔過多，同老鼠仔也無相同。對分類學來講，錢鼠仔同老鼠也係無共種、無共屬、無共科、無共目个動物啊！原來，錢鼠仔毋係「老鼠仔」！

錢鼠仔个目珠花花，細錢鼠仔又比大錢鼠仔還過看毋清楚，故所，錢鼠仔阿姆正會帶等厥子女，排做一列，共下出去尋食，又正共下歸屋。看佢等恁呢，後背該隻咬等頭前這隻个尾，排做一列，對佢屋下過大路个樣仔，還正式有像愛徙去哪仔歇个篷車隊<sup>6</sup>呢！佢看慣序了，也試著係生趣。

人家屋下係畜貓仔樣陣、畜狗仔掌屋；佢屋下，算係分錢鼠仔歇，無收屋稅定定。吾姆講：「佢就無耕無種咩，借佢歇，會仰仔？毋過，分佢咬過个東西，還係愛清核，正有衛生哦！」就係有恁好心个屋主哪！你看啊，錢鼠仔，又在佢屋下樂線个過大路了喲！

<sup>1</sup> 大霸霸仔：音 tai ba ba e'；喻高傲。

<sup>2</sup> 掣仔鞋：音 cad e' hai'；拖鞋。

<sup>3</sup> 瞪瞪仔：音 dem' dem' e'；喻躡手躡腳。

<sup>4</sup> 眼視視仔：音 ngian' sii sii e'；喻瞪眼斜視。

<sup>5</sup> 砑砑砑砑：音 kid kid kog kog；狀聲詞，碰撞聲。

<sup>6</sup> 篷車隊：音 pung' ca' cui / pung' ca' dui；篷車隊(caravaning)行為，幼飽出生5～22天間外出活動時，幼飽們會緊隨母飽，一隻接著一隻頭尾啣接成串活動的特殊行為。

編號 4 號

【帶阿婆去公園寮】李秀鳳原作

阿婆平常時同滿叔歸家人歇在鄉下，放寮日，佢會來佢屋下看佢同老妹有過高無？有過大無？阿婆來个時節，佢同老妹會牽等厥手，帶佢去屋脣个公園寮。

這日，佢等三子阿婆手牽手又來到公園，一叢一叢開啊一等鬧熱个櫻花相爭展分人看靚，一群青絲仔停在櫻花樹頂啾啾滾迎等人客。早春个風吹過來，雖然涼性涼性，毋過，好得有燒暖个日頭花晟啊人歸身鬆爽。

公園肚裡个細陂塘，有畜盡多紅金鯉，還有幾隻肥卒卒仔个鴨仔泅來泅去。「阿婆、阿哥，共快來看。」先走到陂塘脣个老妹幹頭大嫵聲喊。佢牽等阿婆行兼去，看著一隻細老鼠緊拚拚仔泅過來，同一大群紅金鯉、鴨仔搶食麵包，還生趣唷！脣口企等个大人細子，大家都看啊嘴勺勺仔。阿婆嗆啊嘴合毋拏，講佢食到七十歲，還毋識看過老鼠仔泅水泅恁遽。阿婆教佢同老妹唸：「阿貓牯，出門打老鼠，老鼠跌落陂塘肚。拿來煮，全家食落肚，翻床拖蓆<sup>1</sup>肚筍痛啊！何麼死苦！」

行療个阿婆，坐在涼亭下个石凳頂轉擺，看佢同老妹還等本來愛餵魚仔个麵包，扯一細埕、一細埕擲啊地泥下，黏時錫來七、八隻對樹頂颿下來絡食个大尾鼠。大尾鼠蓋圖嘍，毋驚人，還會行前來同老妹討食。阿婆看啊笑弛弛仔，過路人乜頓腳看啊呆呆。

拓拓風，老妹「哇」一聲，講「有蛇哥」，瀉啊涼亭頂捕等阿婆个肚筍，驚啊歸身緊顫。佢過大膽，行啊樹頭下看真啊，大聲嗆講：「該毋係蛇哥啦！係山狗太。」阿婆牽等老妹行過來，看該山狗太緊領頭，親像同佢等相借問。阿婆教佢兩姊妹唸：「山狗太，恁作怪，看著人，領領拜，總有一日，分佢扭著，一片滷鹽一片晒。」

佢問阿婆：「你斷真愛同山狗太扭去滷鹽晒日頭？」阿婆緊拏佢个頭那緊講：「戇孫仔正得！童謠為著湊句又押韻，成時會加一息生趣个字眼來錫細人仔啦！」

佢同老妹最好帶阿婆來公園寮，毋單淨好搞，還做得聽阿婆講古、學唸生趣个客家童謠，三子阿婆輒常寮啊毋想歸屋。

<sup>1</sup> 翻床拖蓆：音 pan' cong' ia` qiaq；形容非常痛苦的狀態。

編號 5 號

【屋背个蓮花塘】溫育華原作

農業社會時代，桃園地區有「千塘之鄉」个名聲，厝屋下有兩口陂塘。屋背係蓮花塘，跔等彎彎幹幹个細路，蓋遽就行到種蓮花个所在。蓮花葉像大唱盤，遠遠看過去全係青柳柳个草色，一陣風吹啊過來，蓮葉上上下下相爭在該跳舞，想愛分人看鬧熱。

蓮花在熱天時節會開花，蓮花開煞就會有蓮蓬，像一個一個个蜂窠，蓮子就厝在裡背。蓮子白淨白淨，阿公拗一支蓮蓬分偌，剝開蓮蓬挖出蓮子丟入嘴項，還苦哪！阿公噓等講：「愛食蓮子愛撞蓮心，正毋會苦丟丟仔。」生在濫泥裡背个蓮根，咬斷時會牽絲，勤儉个阿婆同食毋核个蓮根、蓮子，拿去市場賣，換兜仔所費。

蓮花種在屋脊，在屋肚會鼻著一陣一陣个清香味。成時還會看著龜仔跋啊石頭頂項，頭臥臥仔享受日頭 SPA。鴨仔歸群泗水絡食，不時聽著鴨仔嘰嘰呱呱無停，同恬靜个陂塘加添一息快樂个聲音。用手輕輕掙開蓮葉下个藻冇仔<sup>1</sup>，就會發現像豆菜个蛎

蜆仔，暢樂个泗來泗去在該搞水。

一陣春雨跌下水面，一圈一圈个水波散出去就毋見核了。老弟成時會拿起扁扁个細石頭打水漂仔，一、二、三、四，哇！恁壁。忽然間聽著阿姆喊个聲：「阿華！毋好再搞了，好歸來食晝了！」

屋前个陂塘畜魚仔，有南洋鯉、草魚、鰱仔、大鯉嫲、鱸鰻、鮡仔……。有一擺阿爸同陂塘水旱核，陂塘肚裡个魚仔必必潑潑跳無停，這係偌等最暢樂个時節，大家會拿等面盆仔、錫桶仔、網仔共下下去扭魚仔、潯泥漿，搞啊歸身歸面烏疏疏，就伸兩粒目珠仁，毋過大家還係蓋暢个在該緊扭。

舊年歸老屋下，看著蓮花塘改變了，變做禾田。阿姆講：「後生人全部出外食頭路，哪有恁多時間照顧蓮花！將就放分大伯个佬仔耕種。」雖然現下陂塘有兜个變做觀光休閒農場，用「魚菜共生」个方式耕種，還有兜个做「太陽能光板計畫」、生態公園，毋單淨陂塘个用途變多元化，也同永續經營个理念傳承下去，變做桃園陂塘另外一種生活創意文化。

想著這下係想愛摘清甜个蓮子食，已經無可能了！心肝肚湧起一陣一陣个失落。屋背个蓮花塘，永久永久都毋會毋記得。

<sup>1</sup> 藻冇仔：音 peú pang` e`；浮萍。

編號 7 號

【細山路个風景】謝瑞珍原作

為了自家个健康，佢臨暗頭都有去行細山路个習慣，順續仔這看該看。這條細山路，有兜个兩三個人樣陣，緊行緊打嘴鼓；有兜个會撻等細狗仔散步；也有人會一片行一片打拳，還盡命牯喊啊大嫲聲，這條細山路比市場還過鬧熱。雖然佢不時去行，還係會看著無共樣个風景。

一擺，佢行啊行仔，遠遠就看著一截長棍仔在打馬膠路項，行過近兜仔看，正知係一尾長纜纜仔、烏色間等白色一節一節个遮仔節，對打馬膠路這片慢慢仔趟啊該片去。恁堵好，這時節有一個細阿哥仔一片行路一片頭犁犁仔緊看手機仔，佢共快喚佢頓恬來，無斯佢怕同這尾蛇哥躡下去了！

又一擺，看著一堆人拿等相機對等樟樹緊翕，佢共快行前去看。原來係五色鳥在樟樹頂做竇，堵好鳥嫲同鳥公个換班時間。鳥公含等蟲仔歸來分鳥子食，換鳥嫲飛出去扭蟲仔；成時鳥嫲出去一轉愛十過分鐘，過半點鐘都還畱歸來。這時節，兩隻鳥子就會同頸根擲啊長長，探頭這看該看，就像細人仔望毋得爺哀黏時歸來共樣，樣式實在還生趣。佢乜試著蓋毋盼得，頭臥臥仔緊看

鳥子，心肝肚緊想：「鳥嫲仰還毋歸？鳥子會餓壞了！」佢等陪等鳥子在該等，等到鳥嫲含等一隻調羹仔歸來，佢等就會代佢等歡喜；係等蓋久鳥嫲還畱歸，佢等就會代佢等愁。有一個路過个阿伯噓講：「你等正經係一群戇鳥子。」

不時行這條細山路，下把仔會看著一個阿爸帶等三、四歲个細人仔共下慢慢仔走。這個阿爸个身體蓋砸礮，毋過這細人仔看起來弱漬漬仔，像孱牯<sup>1</sup>樣仔。不時看佢行無幾步就做嬌、喊瘰；毋過厥爸從來毋識大聲哆佢，加嘎蓋有耐心、低言細語鼓勵佢愛多運動，對身體過好。續等，厥爸就會牽等佢个細手，陪佢慢慢仔行。

看等這兩子爺共下行个背影，就像看著還細个時節，阿爸牽等佢个細手樣仔，這就係佢看過最靚个風景啊！

<sup>1</sup> 孱牯：音 zan' gu'；形容人細瘦、發育不良的樣子。